

Andy's Pries

VAN ELKE RENKEN
UT MARX

Andy weer bi sien Grootöllern up d' Böhn gahn, üm de hör Adventssaken rünner to holen. Tomaal seeg he in en Eck en Karton stahn, waar boven en Endje Holt rutkeek. Neesgierig gung he in de Eck un maakde de Karton open. Daar weer en ollen Stukenklock in, un Andy doch glik daaran, wat de för en Bewandtnis harr. Vör sowat twintig Jahr weer dat ween. He weer domaals as Kind mit sien Opa mit 't Radd na d' Wiehnachtsmarkt in 't Dörp fahren. Daar harr dat Tee un Kook geven un ok noch en Braadwurst. Un denn harr sien Opa Losen köfft. Welk för sük un ok welk för sien Enkeljung. Opas Losen weren all Nieten ween, aver Andy harr een Nummer hatt. Heel upgereegt, wat he nu woll kreeg, weer he mit sien Opa na d' Loosbuud gahn. Andy harr sien Loos afgeven, un de Loosverköper weer mit en groot Paket över komen. Mit dat Paket up 't Radd weren de beiden na Hus fahren un sien Opa harr dat Paket up d' Kökendisk stellt. Nu weer ok noch Oma daartokomen un Andy drüff ennelk



ELKE RENKEN

dat Paket open maken. Un wat keem to 'n Vörschien? En ollen gebrukten Stukenklock. Wat weer he trüig ween. Wat sull he daar denn mit? Vööl harr nich fehlt, denn weer he anfangen to brullen. Ok sien Grootöllern weren nett nich blied ween över so en Pries. De Priesen weren woll spendt ween. Aver well spendt denn en ollen, brukten Stukenklock? De Klock weer fell wedder inpackt wurden un Andy harr hüm nich wedder sehn. Nu wuss he, waar de bleven weer. Andy broch de Adventssaken na ünneren un hool denn ok noch de Klock. Sien Grootöllern harren heel nich mehr wusst, dat de noch daar weer. Andy keek sük de Stukenklock nu noch maal genauer an. So slecht seeg de gaar nich maal ut. Weer seker maal düür ween. Un as Andy hüm upwunn, fung he ok glik an to tickern. Villicht geev dat daar ja noch 'n beten Geld för. He settde en Anzeig in 't Internet un kreeg daar doch würrelk noch hunnert Euro för. Mit dat Geld gungen he un sien Fründin mit sien Grootöllern eten. Uplest harren se doch noch watt van de Verloosen vör twintig Jahr hatt.